

Rau Ite Inim Ru To Petrus Imbooda

2 Pita

1 ¹You Simon Petrus, mbesooŋa ve mbaŋooŋa to Yesu Krisi. Nambood rau tonene ilat to yam tamtoghon to aghur ila to Yesu Krisi, ye Maaron toit ve Volaanŋa toit. Ye itaghon ŋgar denja moghon. Tauto igham gham aghur ila toni, ve ghurla tiam ivot kat le raraate inimale yei tiei.

²Maaron pale igham ŋgar tiam ivot le awatag katin ye tau ve Tiina toit Yesu. Leso poia toman luuma toni tiina iza tiam, ve aneep pooi.

Maaron ipoi ghiit tanim le wa. Eemoghon iit irau tagham ngar pida, lesa taghita poiŋ toni anoŋa ivot

³Maaron toit, ye iza tiina pa tapiri ve poia toni. Ŋgar toni to naol, nene popoia moghon. Aghita. Ye ipoi ghiit tanim le, ve ipatooŋ tau pait, lesa tawatag katini ve tapiri iza toit. Ve ila tau tapiri, ye irau ghiit pa ŋgar isob to tambool pani. Leso tataghon ataam toni, ve tagham nepooŋ poia ila toni. ⁴Ve ye igham mbep tintina ve popoia naol pait itaghon saveeŋ mbuaanŋ toni. Saveeŋ tonowen irau itoor gham. Leso Maaron ŋgar toni ineep tiam, ve apaghau taumim pa ŋgar samsamia to taan to lolood igham padi ve tiwaghamun ghiit ne.^a

⁵Maaron igham ŋgar popoia naol tonenen pait, tovenen you nasaav payam: Azuaria gham le aseŋ ghurla tiam pa ŋgar to poia ila Maaron mata ve poia ila tamtoghon matadi paam. Ve aseŋ ŋgar poia tonenen pa ŋgar to tawatag katin Maaron. ⁶Ve ŋgar tonenen, aseŋga pa ŋgar to tanŋin tauud pooi. Ve ŋgar tonenen, aseŋga pa ŋgar to tayoon ariana pa badooŋ patanani. Ve ŋgar tonenen, aseŋga pa ŋgar to mataad inŋgal Maaron ve tataghon ataam toni.^b

a 1:4 2Kor 3:8, 7:1; Ep 4:24 **b** 1:6 1Kor 9:25; 1Tim 6:6; Hib 10:36

⁷Ve ngar tonenen, aseenga pa ngar to lolood pa toŋvetaz toit to Krisi. Ve ngar tonenen, aseenga pa ngar to lolood pa tamtoŋhon tisob ve tagham poian di.^c

⁸Pasa, ighaze azuaria gham pa ngar naol tonene ila ila le tineep ariana ilat tiam, nene irau ngar to awatag Tiina toit Yesu Krisi, ineeep sorok maau. Pale agham anoŋa toni ivot.^d

⁹Eemoghon ighaze tamtoŋhon eta, ngar tovene ineeep toni maau, nene ipatoŋa ighaze ye mata pisi, ma mata maau. Ye igham ngar pa mbep to ndug sambam maau, ve mata ilala pa mbep to taan moghon. Ve uraat to Krisi to ireu sosor toni ve ighami iŋgalaŋ ila Maaron mata, ye lolo imaagh pani wa.^e

¹⁰Tovenen yam toŋvetaz, azuaria gham le ataghon katin ngar naol tonene. Leso taumim awatag kat aghaze Maaron isia gham ve ipoi gham anim le wa. Ve irau atap ve apul murimim pani ne maau. Maau le maau kat.^f

¹¹Ve muri, sawa to aloŋ ala ndug sambam, nene pale tiyaŋin payam, ve tigham gham toman lolodi poia kat. Ndug tonowen, Tiina toit Yesu Krisi to Volaŋa toit ne, pale igham pooz pani le alok.

Petrus ipaes ighaze sawa toni inim igharau wa

¹²Onoon, saveeŋ to aazne nambooda payam, nene paghu payam maau. Yam awatagi wa. Pasa, yam agham saveeŋ onoon, ve akisi tuŋia wa. Eemoghon naghaze napepei ngar tiam pani, lesa matamim kisini.

¹³⁻¹⁴Pasa, you nawatag: Dur tiou^g

to taan tonene, mala maau pale napuli izi. Tiina toit Yesu Krisi ipatoŋ ghou pa mbep tonene wa. Tovenen matag iŋgal naghaze sawa to nanepneep sone, nene poia pa napei ngar tiam pa saveeŋ toni.^h

¹⁵Ve you pale nakaal ataam pida. Lesa sawa to ighaze napul gham ma venen, yam irau matamim kisin saveeŋ to nasavia payam.ⁱ

Muun, Petrus ighita katin Krisi tapiri. Tauto ipariaaŋ saveeŋ toni

¹⁶Sawa to nisaav payam pa Tiina toit Yesu Krisi tapiri ve mulaŋ toni, yei nitaghon vuvuaaŋ soroksorok to ndiran ngara pida to taan titombaana tamtoŋhon pani ne maau. Yei nighita katin Krisi tapiri ve nguruba pa matamai.^j

c 1:7 1Tes 3:12; 1Yo 4:21 **d** 1:8 Yo 15:5; Tit 3:14 **e** 1:9 1Yo 1:7, 2:9+

f 1:10 Hib 3:12-14; 2Pe 3:17 **g** 1:13-14 Dur to Petrus isavia, nene ye tau anoŋa. Ye igham ngar ighaze mala maau pale tirabi imaat. **h** 1:13-14 Yo 21:18+; 2Kor 5:1+ **i** 1:15 Sawa to Petrus ineeep izi Rom, Markus ineeep tomani ve iloŋloŋ Krisi varu ila Petrus avo. Tauto imbooda ila rau ve igharaata. Buk toni tonowen, to aazne tawaata taghaze Varu Poia To Markus Imbooda. Nene ataam eez to Petrus iuul iit Kristen pa mataad kisin saveeŋ toni. **j** 1:16 Mt 17:1+; Yo 1:14

¹⁷Pasa muuŋ, yeiŋa Kriŋi ninepneep, ve nighita Tama Maaron to tapiri ve ŋguruba tiina, ipakuri ve igham Kriŋi ŋguruba isul. Ve nilooŋ Maaron isaav ighaze: “Nanan you taug natug to lolog pani, ve igham ghou lolog poia kat.” ¹⁸Onoon kat, yeiŋa Kriŋi ninep izi lolooz patabuaŋ, ve taumai nilooŋ katin Maaron aliŋa tonowen ineep sambam ve izi inim.

Saveeŋ to muuŋ propeta to Maaron timbooda, mataad kisini ve tataghoni

¹⁹Mbeb naol to tivot pa Yesu, nene tipariaaŋ ghei le nighur ila kat nighaze: Saveeŋ isob to muuŋ propeta to Maaron timbooda, nene onoon. Ighaze yam matamim kisin saveeŋ todi tonowen ve ataghoni, nene pale poia. Pasa, nene inimale lam to ighan ila ndoroom lolo ila ila le ndugizau, ghoru ghazooŋa tau to Kriŋi ivot ighazooŋ ila lolomim, inimale pitum Daga to mboŋmaagh ŋguruba.^{k l}

²⁰Ve alooŋ. Mbeb tiina eez to yam irau agham ŋgar pani pooi, nene vene: Maaron aliŋa to muuŋ propeta toni tivotia ve timbooda, irau tavotia pughu itaghon tauud ŋgar toit maau. ²¹Pasa, propet eta itaghon tau lolo ve isavia saveeŋ tonowen maau. Avuvu Patabuaŋ ipamundigin tamtoŋhon ve igham pooz padi, tauto tisavia.^m

Petrus iveivei padi pa ndiran kaaromŋa

2 ¹Alooŋ. Muuŋ, ndiran pida to tineep ila yes Israela lolodi, titoom tighaze yes propeta to Maaron, ve tighamun ŋgar to tamtoŋhon. Ŋgar raraate moghon pale ivot payam paam. Tovenen apatum gham. Pasa, ndiran pida to tineep ila lolomim, pale timundig ve tighaze tipatoot gham pa Maaron aliŋa. Eemoghon lolodi, ŋgar ŋgozaaŋa inepneep. Yes pale tivotia ŋgar kaarom to iyel pa saveeŋ onoon, ve iwaghamun tamtoŋhon ghurla todi. Ve Tiina todi to ighol sosor todi atia, lesu igham di tinim le, yes pale tipul muridi pani paam. Tovenen yes pale tighamgham tovene ila le Maaron iwaghamun di rikia moghon ve tilaledi.ⁿ

²Ndiran tonanan ledi mayadi maau. Matadi samia tinimale ŋgavuun. Ve ival tiina pale titaghon di pa ŋgar todi samia tonowen. Tovenen ŋgar to tighami, pale inim pughu pa tamtoŋhon tipiyaav saveeŋ velegiiŋ pa ataam to saveeŋ onoon. ³Ndiran tonanan, matadi mbeb kat. Tovenen yes pale titombaan gham pa saveeŋ soroksorok to ivot ila taudi ŋgar todi, lesu tiyub yaam tiam toman mbeb tiam pida. Atia to pale iza todi, Maaron ivotia muuŋ wa ighaze ye pale iwaghamun di ve tilaledi. Ve ye

k 1:19 Pitum Daga to mboŋmaagh, nene iza to Kriŋi ve mulaŋ toni. Aghita Syg 22:16 ve Nam 24:17. **l 1:19** Mbo 119:105; 2Kor 4:6; Syg 22:16 **m 1:21** 2Tim 3:16; 1Pe 1:10+ **n 2:1** Mt 7:15, 24:11; Mbaŋ 20:29+; Jud 4

ighengheen maau. Mata iyaryaar irau sawa isob, ve isasaan pa sawa to iwaghamun di.^o

Maaron ighurghur atia pa ndiran samsamiadi

⁴Aghita. Yes aņela to muuņ tigham sosor, Maaron ighurghur di? Maau. Ye ipiyaav di tizila ndug samia to ndoroom lolo we, lesu tineep tonowe ve tisaņan sawa to ye ingabiiz di ve ighur atia padi.^p

⁵Ve tamtoghon to muuņ tineep izi taan, ve matadi iņgal Maaron maau, tovene paam. Ye ighurghur di maau. Sawa to Noa, Maaron igham yawaaņa tiina ivot, ve irab di tisob timatmaat. Eemoghon Noa to ivovotia nęar deņia to Maaron pa tamtoghon, Maaron iuuli toman tamtoghon toni liim ve ru, ve tineep pooi.^q

⁶Ve ndug Sodom ve Gomora paam. Maaron ighur atia padi, ve igham yab ighan di le tinim avab moghon. Ye igham tovene, lesu ipatooņ ghiit pa nęar to pale ivot pa yes to matadi iņgali maau.^r

⁷Eemoghon Lot, ghoru Maaron igham mulini. Pasa, ye nęeu deņia. Ye ighita ndiran samsamia tonowen matadi samia tinimale nęavuun. Tauto ighami lolo ipataņan kat.^s

⁸ņęeu deņia tonowen inepneep ila tamtoghon to ndug ru tonowen lolodi, ve moghon moghon ilonņlooņ saveeņ todi samsamia, ve ighitghita nęar todi naol to tiyel pa Maaron tutuuņ toni. Tauto lolo ipataņan kat.^t

⁹Mbeb naol tonene tipatooņ ghiit tighaze yes to matadi iņgal Maaron ve titaghon ataam toni, ighaze tovaaņ eta ivot padi, Maaron iwataņ ataam to igham mulin di pa tovaaņ tonenen. Eemoghon tamtoghon to titaghon nęar deņia maau, yes irau tipaghau taudi pa Maaron mbalmbali toni maau. Pasa, ye iwataņ ataam to ighur atia padi to aazne, ve ila ila le sawa to Mboņ Muri, ghoru tigham atia todi kat.^u

Ndiran kaaromņa gabuadi

¹⁰Tovenen Maaron pale ighur atia pa tamtoghon tisob to titaghon nęar deņia maau. Eemoghon ndiran pida, ye pale ighur atia tiina kat iņarua di. Nene yes to nęar todi iņgalaaņ maau, ve titaghon nęar samia to lolodi ipazaagh di pani. Ve tipait taudi izadi, ve titaghon taudi nęar todi moghon. Ve matadi izi pa yes pooza to Maaron ighur ghiit ila sambadi. Yes timatughez pa mbeb eta maau. Aņela to sambam to izadi ve tapiridi tintina ne paam, ndiran tonanan matadi izi padi inimale mbeb sorok.

¹¹Iit tawatag: Aņela to sambam, tapiridi tintina ve tilib pa ndiran

o 2:3 Ro 16:18; 1Tes 2:5; 1Tim 6:5; Tit 1:11 **p** 2:4 Jud 6; Syg 12:7+, 20:2+
q 2:5 Mbnp 7, 8; Hib 11:7 **r** 2:6 Mbnp 19:24+; Jud 7 **s** 2:7 Mbnp 19:15+
t 2:8 Mbo 119:136 **u** 2:9 Mbo 34:17+; Ro 1:18; 1Kor 10:13

tonanan. Eemoghon irau tipiyaav saveej velegiij padi ve tisees matadi ila Maaron mata maau.^y

¹²Mbeb to ndiran kaaromŋa tonanan tipiyaav saveej velegiij pani, taudi tiwatagi maau. Tikankaan pani. Yes tinimale ŋgai sagsag to tineep izi taan, leso tamtoghon tisavag di ve tirab di timatmaat. Ledi ghilalooŋ rita maau. Ighaze ŋgar samia eta ivot padi, nene tila pa naghodi moghon. Tovenen muri, yes pale timaat ve tilaledi tinimale ŋgai.^w

¹³Ŋgar samia to tighamghami, nene iwaghamun tamtoghon. Tovenen muri, Maaron pale iwaghamun di paam. Yes mayadi maau. Tighunghun ve tighamgham ŋgar samsamia naol ila tamtoghon matadi pa ndag. Ŋgar tovene igham di lolodi poia kat. Ŋgar todi iŋgalaan ila Maaron mata maau. Tovenen ighaze yamŋa alup gham pa ghanghaniij ve suŋuun, yes tigham lupuun tiam isami, ve tigham gham mayamim. Eemoghon yes tinidi iza pa ŋgar kaarom to tighamghami.^x

¹⁴Ŋgar samia, yes irau tipuli maau. Matadi samia ve tigharghaar kat. Ve yes to ghurla todi iyaryaan sone, ndiran tonanan tigheghereb di pa ghamuun ŋgar samia. Ŋgar to mataad mbeb, yes tiraua kat! Moghon moghon tiyouyou mbeb to nditadi. Tauto mbalmbali to Maaron inepneep toman di, ve ighaze iwaghamun di. ¹⁵⁻¹⁶Tovenen ataam denja to Maaron, yes tipuli wa. Ve aazne, titaghon ataam samia. Ŋgar todi inimale ŋgar to Beor natu Balam. Balam, ye propet eez to muun ivotia Maaron aliŋa. Eemoghon lolo pa yaam kat, tauto igham ŋgar to denja maau. Iit tawatag: Esele tisavsaav maau. Eemoghon Maaron igham esele to Balam isaav inimale tamtoghon, ve iyaan Balam pa ŋgar to borouŋa to ye ighaze ighami. Tauto ipul ŋgar tonenen.^y

¹⁷Ndiran kaaromŋa tonanan, saveej todi anoŋa maau. Yes tinimale taan saambu to muun ya ivotvot pani, ve aazne imaak wa. Ve yes tinimale yaghur tae to taghita ve taghaze uman pale izi. Eemoghon maau. Yaghur iviviira ve ila. Ndiran tonanan, Maaron igharaat ledi inadi pataghaan wa. Ndug tonowen, ndorooma tiina le tiina kat.^z

¹⁸Pasa, yes tipapait taudi izadi, ve tisasavia saveej soroksorok naol to le anoŋa maau. Ve tipazaagh tamtoghon pa ghamuun ŋgar samsamia naol to uliid. Aghita. Ndiran pida, ŋgaramus titoor ŋgar todi ve titooava pa tipul nditadi pida to tiyel pa ataam to Maaron. Eemoghon ndiran kaaromŋa tonanan tighereb di timulmuul pa ŋgar todi muŋgina.^a

¹⁹Yes tisavsaav padi tovene: “Ighaze yam ataghon ghei, nene irau tiŋgalsekin gham pa mbeb eta maau. Yam irau ataghon taumim lolomim pa mbeb to naol.” Eemoghon taudi tinim mbesoŋa sorok pa ŋgar samia

v 2:11 Jud 8,9 w 2:12 Jud 10 x 2:13 Ro 13:13; 1Kor 11:20+; Jud 12
y 2:15-16 Nam 22:4+; Jud 11; Syg 2:14 z 2:17 Jud 12+ a 2:18 Jud 16

to tighamghami. Pasa, ighaze mbef eta tapiri ilib pait ve igham pooz pait, nene iit tanim mbesooŋa pani.^b

²⁰Ndiran tonanan, tikaria taudi wa. Pasa, ighaze tamtoghon eta iwetag Tiina ve Volaŋa toit Yesu Krisi, ve ipul muri pa ŋgar samia to taan, eemoghon muri izi ve ŋgar samia ikau ve itatani muul, ye pale isami kat. Papazogi poia ris. Ve aazne, isami le isami kat.^c

²¹Inimale yes tiwatag ataam deŋia to Maaron maau, tone poia. Ve aazne, tiwatagi, ve tigham tutuuŋ patabuaŋ to Maaron wa. Eemoghon tizi ve tighur muridi pani.^d

²²Ŋgar to tighami, nene itaghon saveeŋ waaro ru to moghon moghon tasasavia di ne: “Ŋgavuun iluara izi, ghoru imuul ila ighan lulua. Ve ŋgai tovene paam. Ighaze timen tini le iŋgalaŋ, nene pale ipeli ila tiŋ muul.”^e

Krisi izuar maau. Ye pale imuul inim

3 ¹Ndiran tiou, you lolog payam kat. Nene rau ite to nambooda ilat tiam. Rau tiou ru to nambood di, pughudi ee moghon. Naghaze napei ŋgar tiam muul, leso ataghon ŋgar ŋgalaŋa moghon ila Maaron mata, ²ve matamim iŋgal aliŋa to muuŋ yes propeta patabuaŋa tivotia, toman tutuuŋ to Tiina toit Krisi, ye Volaŋa toit. Tutuuŋ tonowen, mbaŋooŋa toni tisavia payam ve alooŋa wa.

³Alooŋ. Mbef tiina kat to you naghaze yam awatagi, nene vene: Sawa muri ighaze ivot, nene pale tamtoghon titaghon ŋgar samsamia naol to lolodi ipazaagh di pani, ve tiveleg Tiina toit.^f

⁴Pale tisaav tighaze: “Laak, saveeŋ to muuŋ Krisi imbua ighaze ye pale imuul inim, pale ŋeez o anoŋa ivot? Pasa, sawa to nditimbud ve inim aazne, mbef eta itoora maau. Mbef tisob tineep toman inadi. Sawa to Maaron ighur di ve inim, tinepneep tovene moghon.”^g

⁵⁻⁶Yes tiwatag. Muuŋ kat, Maaron isaav moghon, ve sambam ve taan tivot. Ve ya induur taan ila indoui, tauto taan ineep sala, ve ya ineep sila. Ve muri, sawa to Noa, Maaron igham ya ivon toman tapiri, ve itatab taan muŋgina tonowen, toman tamtoghon ve mbef tisob to taan, ve ireu di tilaledi. Eemoghon ndiran kaaromŋa tonenen lolodi pa tigham ŋgar pa mbef tonene maau.^h

⁷Ve aazne, saveeŋ ee moghon tonenen ipalot sambam ve taan, tauto tineep toman inadi. Ve ye pale iŋgin di pooi tovene ila ila le sawa to Mboŋ Muri, ghoru yab tiina ighan di. Sawa tonenen, ye pale

b 2:19 Yo 8:34; Ro 6:16; 1Pe 2:16 **c 2:20** Mt 12:43+; Hib 6:4+; 1Yo 2:16

d 2:21 Lu 12:47+ **e 2:22** Np 26:11 **f 3:3** 2Tim 3:1+; Jud 18 **g 3:4** Mt 24:48

h 3:5-6 Mbnp 1:1,6+, 7:11,21; Hib 11:3

ingabiiz ghiit. Ve tamtoghon tisob to titaghon ataam toni maau, ye pale ighur atia padi ve tilaledi.ⁱ

⁸Yam ndiran tiou, lolog payam kat. Mbeb eez to naghaze lolomim imaagh pani malep. Nene vene: Tiina toit, ye ighita ndag ee moghon inimale ndaman ndiñndiñ eez (1000). Ve ighita ndaman ndiñndiñ eez tinimale ndag ee moghon. Ndag eez ve ndaman ndiñndiñ eez, nene raratedi ila mata.^j

⁹Onoon, tamtoghon pida tigham ñgar tighaze Tiina toit izuar pa taghoniñ saveeñ mbuaañ toni. Eemoghon maau. Ye ighur soso payam. Pasa, lolo pa tamtoghon eta ilale malep. Ye ighaze tamtoghon tisob titoor ñgar todi ila pani. Tauto itatan ate, ve ighur atia pa tamtoghon rikia maau.^k

¹⁰Sawa to Tiina toit imuul inim, ye pale ikarmotin ghiit inimale ñgeu yubyub. Ghoru sambam paroñania isob ilale toman avolutu tiina kat, ve yab ighan mbeb to tineep ila sambam paroñania, ve tisob tilaledi. Ve taan toman mbeb to tineep izi taan ne paam, yab pale ighan di tisob tilaledi.^l

Tagharaat tauud ve tasaan Tiina toit

¹¹⁻¹²Tovenen muri, Maaron pale ipasob mbeb tisob ve tilaledi. Ighaze venen, sa ataam to pale ataghoni? Yam irau agham ñgar patabuañ moghon, ve matamim ingal Maaron ve ataghon ataam toni, asañan sawa tonenen, ve tinimim imbees pa uraat to votiaañ varu poia. Leso apasul sawa tonenen ve ivot rikia. Sawa tonenen ighaze ivot, nene pale yab iyaryaar ve ighan sambam paroñania, ve igham mbeb tisob to tineep ila sambam paroñania, tireer ve tilaledi.^m

¹³Eemoghon iit taghurghur mataad pa sambam paghu ve taan paghu to pale tivot titaghon saveeñ mbuaañ to Maaron. Sambam ve taan papaghu tonowen, ñgar deñia moghon pale ineep ila.ⁿ

¹⁴Tovenen ndiran tiou, sawa to aneep ve asasaan sawa to mbeb tonenen ivot, yam azuaria gham le ñgar tiam isob ingalaañ moghon. Leso lemim sosor eta ila Maaron mata maau, ve yamña Maaron alup gham anim ee moghon ve aneep pooi.^o

¹⁵Ñgar to Ñgeu Tiina to ighurghur atia pait rikia maau, ve isasaan ghiit pa tatoor ñgar toit, yam agham ñgar pani pooi. Ye ighamgham tovene pasa, lolo isamin ghiit ve ighaze igham mulin ghiit. Tonvetaz toit Paulus to lolood pani kat, Maaron igham le ñgar tiina. Ye imbood saveeñ payam pa mbeb tonene raraate inimale saveeñ tiou tonene.^p

i 3:7 Mt 25:41; 2Tes 1:7+ **j** 3:8 Mbo 90:4 **k** 3:9 Ro 2:4; 1Tim 2:4 **l** 3:10 Mt 24:29; 1Tes 5:2+; Syg 16:15, 20:11 **m** 3:11-12 Lu 12:36; Tit 2:13 **n** 3:13 Syg 21:1,27
o 3:14 Pil 1:10; 1Tes 3:13, 5:23 **p** 3:15 Ro 2:4

¹⁶Rau tisob to ye imbood di, ye isavsaav pa mbeb tonene. Onoon, saveeņ toni pida, pughu ariaja, ve ipataņan pait pa tagham űgar pani. Tauto yes to ghurla todi iyaryaaņ sone ve tikankaan pa Maaron űgar toni, tighamun saveeņ toni, raraate inimale tigham pa Maaron aliņa pida to timbooda. űgar todi tonowen pale inim pughu padi pa tilaledi.

Petrus ipasob saveeņ toni

¹⁷Ndiran tiou, you lolog payam kat. Matamim ingal. Mbeb naol tonenen pale tivot. Ve aazne, napaghazoņan gham padi pataghaaņ. Onoon, Kriši igham gham ayoon ariaja. Eemoghon yam irau apatum gham. Pa vene, yes to tizorzoor tutuuņ to Maaron, tiweu gham pa saveeņ kaarom todi, ve atap pa ghurla tiam, ve apul murimim pa Kriši.^q

¹⁸Yesu Kriši, ye Tiina ve Volaaja toiti. Azuaria gham le awatag katini, ve aneep tuņia ila poia toni.^r

Ye iza tiina pa tapiri ve poia toni. Tovenen iit tapaiti to aazne, ve itaghoni taghoni le taan sawa. Onoon.